


# TIITHI ABRAHAMU

 Eliivuru ya Maphattuwelo-tho, kapiitulu 22, opacerya versiikulu 15, ni ninwehererya vano olavula okathi vakhani paahi ni opacerya epantte ya olaleya. Maphattuwelo 22, opacerya ni versiikulu 15.

*Vano nlaikha n'APWIYA nahimwiihana Abrahamu okhuma wirimu emaara ya neenli,*

*Khwira, miyo koolapha Mwa nsina naka, anihimya t'APWIYA wira nyuwo mookiirela etthu yeela, nave khamukikhoottihenrye mwan'inyu, mwan'inyu mmosene:*

*Wira mooreerihani kinimorerihani, kaacereryaka kinimwaacererya osuulu anyu ntoko ittheneri sa wirimu, ni ntoko mihaava siri ophareya; nave osuulu anyu onookuxa mikhora sa nwanani aya;*

*Ni mwa osuulu anyu maloko othene a mulaponi anooreerihwa; okhala wira muhiwelela nsu naka.*

<sup>2</sup> Natiri xeeni, mwaha wo wiiwelela! Wiiwelela ti etthu Muluku onthunaawe. Yootoko ohimmwa emaara emosa, “Wiiwelela ti wooreera ovikana ovaha mukuttho.” Owiiwelela Apwiya ti wooreera ovikana khula mukuttho mwaakhanly'anyu wiiraka.

<sup>3</sup> Hiyo niri ohoodo vano wa y'osoma yuulupale, ohiy'ula, *Tiithi Abrahamu*, yoowo aaihaniwe “tiithi a Waamini,” okhala wira Muluku aahimmanela natiri wira arithi elapo, ni Osuulu awe. Ni ti mwa Abrahamu hiyo, nikhwaaka mwa Kristu, ninkhalaahu Osuulu w'Abrahamu ni alipa-oorithi ni Yoowo ntoko sinihimyaawe natiri.

<sup>4</sup> Vano, Abrahamu aari mutthu pure paahi, khaarina etthu yoosuwaneyaxa. Muluku khonaphiyeryeke omwiihana, ntoko sirinaahu voolempwa, mpakha waarinaawe miyaakha miloko mithanu na miili ni mithanu. Amwaar'awe, yaawo yaari murokor'awe nuusu, arineene miyaakha miloko mithanu na mosa ni mithanu okathi uwo, awo alakela yaakhalasa hoothe okhuma okathi waarisaaya amiravo. Ni owo aari oowuupaala, ni khaarina aana. Muluku aaihanenle nvalaano muulupale, wira aivalaanihe ni olumwenku mukina, ni wa athu awe othene, ni amusi awe othene. Yaahikhala etthu yoosuwaneyeya wira owo iire.

<sup>5</sup> Nto okathi Muluku onoowehereryaaweni nyuwo wira etthu yoosuwaneyeya, Owo onvekela wiivalaaniha voomalela khula ohoverya. Nyuwo muhaana ophiyererya wiiwelela voomalela, wira mwiiwelele etthu Owo onihimyaawe. Muluku onvekela

yeyo. Khimukhanle wiiraka-tho enamuna ekina. Nto, vano, Owo kweekwe onvaha ethooneryo, nto eyo yaari ethooneryo Awe, yo wiivalaaniha ni amusi awe othene, amusi awe othene, ni siiso, wira eetteke ni makhalelo owiivalaaniherya wa Muluku.

<sup>6</sup> Miyaakha saahivira, khuhiiraneya etthu, masi nnakhala vo Abrahamu aahilipa. Owo khaavolonle. “Owo khaamuhovenrye natiri a Muluku mwaha wo ohaamini, masi aahikhalana ikuru, amuttotopelaka Muluku.”

<sup>7</sup> Eyaakha t’iyaakha, okathi waaviraaya, vekeekhai alipa-oowuulumela anci-ene yaanirwa ni wira, “Abrahamu, tiithi a maloko, aana akavi murinaanyu vano?” Eyo khiyaamuhoverinhe. Hata mwaana, ni Saara aahiviriha okathi wa ekumi, yo oyara, tthiri, ohoolo saana nuumala ohiya wona mweeri, masi nnakhala vo Abrahamu aanimwaamini Muluku siiso. Owo aahiitthokiha mwaha wa mwaana, okhala wira aahisuwela ni aahikupali voomalela wira Muluku khaakhanle omulapaka natiri Owo vahaakhanlyaawe ophiyeryaka omulipiherya.

<sup>8</sup> Osuulu Awe waahaana wuupuwela siiso. Voohicala moota xeeni enooneyaaya ntoko yoohikhala, moota xeeni enooneyaaya ohikhala y’ephattu wa muupuwelo w’erutthu, nnakhala vo Muluku khokhanle ommanaka natiri Owo ohikhanlyaawe oophiyeryaka wira ammaliherye. Hiyo ninnaamini yeyo olelo. Khula Osuulu w’eekeekhai wa Abrahamu onaamini etthu yeyo. Voohicala sookhumelela xeeni, mwaattelo xeeni wa osuwela othukumannyaahu, itthu kavi sikhumelenle, moota xeeni enooneyaaya ohikhala y’ephattu wa muupuwelo w’erutthu, ohitthokeleleya xeeni eryaaya, kiireke, wa muupuwelo w’erutthu, khivanvirikana hata vakhani. Vakhala wira Muluku ohimnye siiso, ti yeyo. Ni Osuulu w’Abrahamu onlipa mwa SIISO ANIHIMYA T’APWIYA. Eyo ennimaliha mwaha.

<sup>9</sup> Hiyo ninnoona wira, mwa miyaakha miloko miili ni mithanu ohoolo waya, khaakhanle mwaana. Nave nnakhala vo Muluku aari ooromeleya wira ammaliherye natiri Awe wa Abrahamu, okhala wira Abrahamu aahimwaamini Muluku. Mwammiravo aahirwa vanlakani, Isakhi mwaamukhaani.

<sup>10</sup> Vano Isakhi mwaamukhaani vakhumelenlyaawe vanlakani, nto ninnoona wira Muluku aanvahale wehereriwa wa vaara vaili. Owo khwira, “Mwaan’ola...” Nuumala okhalana vano miyaakha soophiyaka emiya ni muloko ni mithanu, wala miloko miili, Abrahamu aarinaawe. Owo khwira, “Kinthuna wira mmukuxe yoola, mwan’inyu mmose-ene, nto mmuroihe vamwaako kinrowaaka woothooneryani, nto vaavo mwanvahe, vamwaako yoola, ntoko mukuttho.” Mwa moolumo makina, ohonona iyoonihieryo sothene owo aarin’awe wira natiri aamurowa omaliheriwa. Iwo okumiha itthu sothene sa erutthu.

11 Nto Abrahamu khwira, “Miyo kimwaakhenle ntoko mmosa w’alipa-ookhwa. Ni miyo kookupali voomalela wira Owo onniwerya omuhihimuxa mw’alipa-ookhwa.”

12 Ti siiso n’atthu vano akhanle Osuulu w’Abrahamu, okhala wira Owo oonihihimuxa mw’alipa-ookhwa. Hiyo naahikhwa mutampini ni sootheka. Nto Ole aawenrye orukunxa muupuwelo aka, orukunxa soowuupuwela saka, orukunxa mukhalelo aka, okirukunxa miyo voomalela, Owo onoowerya wira ele emmusivela. Etthu p’itthu Owo onihimyaawe, miyo kinnaamini wira eyo Ekeekhai, ni khula Osuulu w’Abrahamu onaamini yeeyo.

13 Abrahamu, kahi oohimwiiwelela Muluku, aahimukuxa mwammiravo owo. Nto voosiisu uwo, khwaahimeerya arumeyi, “Nyuwu mulipeleleke vaava ni amwaapuuru. Nto mwaana ni miyo ninrowa iwe nakokhorele, nto owo ni miyo ninootthika.” Oh, owo onrowa wira sayi? Okathi owo vanwelaawe vasulu va mwaako, wira akumihe ekumi ya mwan’awe, nnakhala vo owo oniira, “Mwanamwane, mmiravo ni miyo ninootthika.” Owo aanisuwela wira etthu yaahaana okhumelela. Vano owo khaasuwela oratteene moota Muluku aarowaawe wira; owo khuwaari ti mwaha ene. Owo aahisuwela wira Muluku aahihimya eyo.

14 Ti yeeyo tu ennicala osuwela, Muluku oolaiherya! Enrowa okhala sayi? Nkinwerya wooleelani. Masi Muluku ohimye siiso! Owo onoonveleliha Yesu Kristu, emaara yaneili, Owo onimoorwa mwa mukhalelo w’erutthu. Owo onoorowa waahimya ale akhanle Awawe. Sinookhala miyaakha ekonto emosa, omwene wa miyaakha ekonto emosa elapo yeela, ni Yoowo, n’ale oovuluxiwa. Ti yeeyo Owo ohimyaawe, ni hiyo ninwehererya okathi yoowo ophiya.

15 Owo oolaiherya waavoniha aretta, waahihimuxa alipa-ookhwa, owoomola axetwani. Owo aahihimya wira yeeyo. Owo mmosaru nsana, olelo ni mahiku othene. Sayi? Miyo nkisuwenle. Owo oolaiherya wira! Hiyo ninnaamini; eyo ennimaliha mwaha. Okathi mutthu onimwaamini awe Muluku, owo onnaamini sothene Owo onihimyaawe.

16 Nto ti siiso Abrahamu aamwaamini awe Muluku. Vano aahivekeliwa ohonona khula eyooniheryo wira natiri Awe aammaliheriwa, masi owo aahikupali wira Muluku aaniwerya wira.

17 Vano, kahi wira Owo paahi aanvanhe natiri ula muulupale, Owo nave-tho, aanvanhe Osuulu awe. Ni okhala wira Abrahamu aari oororomeleya, ni aahisuka Masu a Muluku Muluku aamulaihenryaawe, ni aanisuwela wira Muluku aaniwerya omuhihimuxa mwaan’ola. Vano owo khaamwiinanenle mwan’awe; masi (Muluku) yaari ethooneryo ya Muluku anvahaka Mwan’Awe, vekeekhai; okathi owo aawelaawe

mwaako akunxe-ene ikhuni, ni siiso; ntoko Kristu ohoolo waya aatthempe-awe nluku Nawe na mukuttho, vasulu vamwaako, vaavo Owo aakhomeliwaawe-vo.

<sup>18</sup> Hiyo ninnisuwela wira mwa yeela, airaka yeela, yaahimusivela Muluku saana woona wira Abrahamu aahimpenta Owo vasulu va itthu sothene elapo ya vathi, hata mwan'awe mmose-ene. Owo aanimphenta vasulu va etthu va khula mutthu aakhanlyaawe ohimyaka, khula mutthu aakhanlyaawe wiiraka, nnakhala vo owo aanimphenta Muluku voophiyerya wira aamini Masu Awe.

<sup>19</sup> Osuulu wothene wa Abrahamu onimwaamini Muluku siiso. Awo animwaamini Muluku. Ni hiyo noosuwela wira eyo yaahimusivela Muluku saana mpakha ela va okhala etthu Owo ohimyaawe, "Osuulu anyu onooxintta mikhora sa nwanani aya." Muupuwele, eyo ti SIISO ANIHIMYA T'APWIYA. Osuulu w'Abrahamu onnaamini yeeyo. Nyuwo mwakhala Osuulu wooloka w'Abrahamu, waamini Abrahamu aarinaawe wa Muluku, ori mwa nyuwo. Ni munnaamini wira ele Muluku ohimyaawe, Muluku onnimmaliherya natiri Awe.

<sup>20</sup> Ni Owo iirale, vano muupuwele, Owo aammanenle paahi natiri ula Abrahamu vaamanlyaawe onvaha wehereriwa. Osuulu w'Abrahamu ohaana toko wehereriwa, wira wooniwe sinto veekkhai onnaamini Masu. Muupuwele, enamuna emosa paahi owo aakhanlyaawe omusukaka natiri a Muluku, okhala wira owo aahimwaamini natiri a Muluku, ni aahehereriwa sinto aanimwaamini Yoowo wala nnari.

<sup>21</sup> Hiyo ninniruhiwa mowehereriwani mmo. Osuulu w'Abrahamu, olelo, oniruhiwa mowehereriwani mwemmo. Ninrowa okuxa Masu a Muluku, ahiiso ninkuxa ele mutthu ohimyaawe sa Yaawo? Ninrowa okuxa ele mutthenkeso khata opanke aya ntoko eyaaminelo, ni okupali yeeyo, wala ninkuxa ele Muluku ohimyaawe? Vakhala wira Masu a Muluku t'eekkhai, hiyo ninnaamini Masu a Muluku, voohicala ele ekhanle etthu ekina. Nihye moolumo othene a mutthu akhale owootha, nto a Muluku akhale Eekkhai. Osuulu w'eekkhai wa Abrahamu! Masi muhinatthi okhala Osuulu owo w'eekkhai, muhaana ovira mowehereriwani, ntoko Abrahamu ene, saavinryawe. Owo khomulaihenrye Abrahamu paahi, masi wira Osuulu awe waamuxintta mikhora s'awanani. Oh, wulu!

<sup>22</sup> Muupuwele paahi, tiithi aari ookupali voomalela yeeyo, mowehereriwani mwawe wa natiri a Masu a Muluku, wira yaari eeekkhai. Voohicala iye saari sookhumelela, nnakhala vo owo aanaamini wira Masu yaahikkhalana exariya. Abrahamu, tiithi muulupale, khaahovenrye, vaphiyalyaawe okathi ule wo wehereriwa. Owo aahaamini wira Muluku aaniwerya omuhihimuxa mw'alipaa-ookhwa. Owo aahaamini, okhala wira

Muluku aahimmana natiri. Ni okathi Muluku ommanne awe natiri wira owo aarowa okhala “tiithi a maloko,” ni owo aahaamini wira yaari siiso. Owo khaasuwela moota yaarowaaya okhala. Okathi orwiiyaawe mwaana, vaamanlyawe ororomela, miyaakha miloko miili ni mithanu, vano khuvekeliwa wira amuhonone mwaan’owo, nnakhala vo owo aanisuwela wira natiri a Muluku aari eekeekhai, vano owo khunvaha mwan’awe.

<sup>23</sup> Osuulu Awe, etthu emosaru! Natiri a Muluku ti ekanyeryo, w’ale akhanle Osuulu w’Abrahamu. Natiri ekanyeryo, namoona oolempwa. Nto okathi onaamini ahu Masu othene oolaiheriwa, vano ekanyeryo ninoovahiwa, wira mwa yeeyo emulipiherye natiri. Moone, hiyo na—hiyo nirye-ene Osuulu w’Abrahamu, ninoovira mowehereriwani wira nooniwe vakhala wira ninoorowa omwaamini Bibilia, wala nnari, Bibilia ti Masu a Muluku, okhala wira Awo Mulukuu, vano nto moovira mowehereriwani, wira mwaamini.

<sup>24</sup> Okathi akina aniiraaya, “Mahiku a miiriirya aavira,” nyuwo mwakupali-ru eyo, eyo ti yoovirikana ni Masu.

<sup>25</sup> Mwaahimyaka wira, “Khenakheliwa Erooho Yoowaarya, olelo. Khiyaavo etthu ene eyo. Arummwa muloko n’aili paahi ti yaakhenle Eyo.”

<sup>26</sup> Masu ahimmye wira, Petru alaleyaka Yeeyo Nihiku na Pentekosite, owo iirale, “Murukunxe murima, khula mmosa a nyuwo, mpatisiwe mwa Nsina na Yesu Kristu wira muleveleliwe itampi, nto munimwaakhela yoovaha ya Erooho Yoowaarya. Tthiri natiri t’awinyu, ni awaya an’inyu, n’ale ari ottaiwene, othene ale Apwiya Muluku ahu anthhunaaya owiihana.”

<sup>27</sup> Vekeekhai eyo t’ile Eyo enihimyaaya. Ti, vano nyuwo mwalikanana-ru opaka nimwaleyo, nimwaleyo na aasitu a Muluku, ni otthara elepeliwo murette eyo, kinimooleelani, munoosuwela wira Muluku onnimaliherya Masu Awe, mwaamini-ru Yaawo. Ti yeeyo. Masi muhaana ovira mwa yeeyo, okhala wira eyo ekanyeryo; mwaaweryaka waakhela Yeeyo, vano munoomwaakhela natiri. Okhala wira, Eyo elepelo murette ya Muluku, enamuna vaatthuneya hiyo wira, ni ti siiso nrinaahu otthara Yeeyo, siiso ntoko Owo sihimmyawe. Vano kahi w’atthu amosa-amosa paahi, masi “othene,” othene ole onrowa waamini, othene ole onrukunxa murima, othene ole onaamini. Eyo ti ya maloko othene, wa atthu othene, othene ole onthhuna wamini Yaawo. Ni waamini Masu a Muluku onooruhani mpakha natiri yoola. Vano, nto vo paahi, nyuwo munoowerya okhalana owerya wo okuxa ekanyeryo ya natiri.

<sup>28</sup> Ni natiri hiyo nimmwaakhelaahu, ekanyeryo, ti opatiiso wa Erooho Yoowaarya. Ti yeeyo. Maana owo ti Muluku mwa mukhalelo wa Erooho, nyuwo mukhalaka Masu Awe mwa nyuwo, vano Owo onookela. Nyuwo mwaakhela-ru Masu mwa nyuwo, Erooho Yoowaarya t’itthu emosa paahi enwerya okhalaha

Awo makumi, vano nto munookhalana natiri ooxintta mukhora wa khula nwanani omphavela wootuphelani. Ti yeeyo. Muluku oolaiherya, nto ti siiso.

<sup>29</sup> Vano, muupuwele, nyuwo munoowerya wira yeeyo okathi ene yoowo, vano nto paahi, nuumala wehereriwa ni Masu.

<sup>30</sup> Abrahamu aahehereriwa ni Masu. “Munimwaamini, Abrahamu, wira munookhalana mwaana?”

“Ayo.”

<sup>31</sup> Mwaana khurwa. “Vano mmuhonone. Nyuwo nlelo munnaamini, Abrahamu?”

<sup>32</sup> “Miyo kinnaamini, nlelo, wira Nyuwo munniwerya omuhihimuxa mw'alipa-ookhwa.”

<sup>33</sup> Nto nuumala yeeyo, Owo khwira, “Vano, Osuulu anyu onooxintta mukhora wa nwanani aya.” Amen! Nuumala orwa wehereriwa!

<sup>34</sup> Nrowe naawehe amosa-amosa a osuulu wa Abrahamu, mwa osuulu w'erutthu. Yoowo, hiyo nikhanlyaahu olelo Osuulu wa muroohoni. Masi nrowe nisuwele, ni osuulu w'erutthu, akina w'ale yaamwaamini natiri oomalela a Muluku, ni nnakhala ohi- . . . [Nipuro vahiitthu mufiitani—Mol.]

<sup>35</sup> Miyo khwira, “Nihaasyaka vo, xeeni mwali muKristu otthunaka wooniha esaaya awe ya muhina? Nkinwerya osuwela saana eyo.”

<sup>36</sup> Nyuwo mooyariwa vasya, a Muluku, mookhalana oreera wa Erooho Yoowaarya wira yooniherye ele mukhan'yanyu. Nyuwo mwa, nyuwo mookhalana nneema isaaya iya soohifayi sihirinaaya, ti yeeyo, muthiyana eekeekhai a Muluku, onooniherya ni nneema, nyuwo khino munootheiwa, ni wiihaniwa a khalayi; masi nyuwo mookhalana etthu awo ahinweryaaya okwannya, ni ehaapweteya nave ahinrowaaya-tho owerya okhalana. Eyo ekeekhaii. Mookhalana nneema. Ti yeeyo Muluku omphavelaawe, ti nneema. Munnona?

<sup>37</sup> Masi voopacerya, waakhanle-ene ohoverya mmuruni mwanyu, muhiire nnakhala. Muhirwe muliinyani mwa mavekelo waakhanle-ene ohoverya mmuruni mwanyu. Muhirwe vahikhanle wira munimwaamini mara, voolipiherya, ohikhale oxekezeyo mmuruni mwanyu, nnakhala, masi munrowa ovonihiwa, vano nyuwo munookhuma vaplataforma va mutthu mukumi. Ti yeeyo, waahikhale-ru ohoverya mmuruni mwanyu, nnakhala. Muhaana omwaamini Muluku, kahi wiipaka waamini. Vekeekhai waamini!

<sup>38</sup> Vano Osuulu w'Abrahamu onnaamini okhala wira Masu ahimye siiso, ni mwaha wa yeeyo hiyo ninaamini ahu. Kahi mwaha wo wira mutthu ohuulumela, okhala wira mutthu mukina ohimye siiso. Okhala wira Muluku ohimye siiso, eyo ennikkhalaha Ekeekhai. Muluku ahimyar, eyo

ennimaliha ohoverya wothene. Owo ti nuulumo nookiserya. Owo ti nuulumo nookiserya. Muluku ahimya etthu p'itthu, eyo ennimaliha mwaha. Khekanle hat'etthu ekina enwerya olavula voovirikanya Yeeyo. "Masu othene a mutthu t'owootha, nto Awaka ti Ekeekhai."

<sup>39</sup> Vano okathi oniwehaahu osulu ola kamosa-kamosa, nrowe nuupuwele. Hiyo niniwuupuwela aana aHeperi, miyo kookhalana va, kuupuwelaka yeeyo, aana aHeperi, vaamanlyaaya wehereriwa voovirikanya okokhorela elatarato. Vano, muupuwele, mwene aahimye wira, "Ole ohinrowa wuuramela elatarato ela, onooriheleliwa muttukuthani mwa mooro." Vano, aana ala yaanaamini wira Masu a Muluku yaari eekeekhai, wira awo khayaakhanle okokhorelaka hata muthinto wa elatarato, masi vaphiyenryaaya wooniheriwa ni khwehereriwa wira yooniwe khama yaamukokhorela.

<sup>40</sup> Okathi, aana othene akina iwe yaakhelansaaya khurowa okokhorela, awo yaaronwe voolikana ene ntoko mwene saahimyaawe. Awo yaatthanre enamuna yo wuupuwela wa anamunci-ene a nihiku nle, wira yaahaana wira.

<sup>41</sup> Nto veehereriwaaya, wira yooniwe khama yaamukokhorela ilatarato ni ovirikanya Masu a Muluku, awo yahikhala ooromeleya wa Masu. Voohicala sookhumelela, awo yaahikhala ooromeleya wa Masu. Nto vaarihenlyaaya muttukuthani mwa mooro, natiri a Muluku aahimaliheriwa. Awo yaahixintta mikhora sa nwanani aya. Vano aahikhala Mulopwana mmosa a neexexe aaphwanyaneya mwemmo, ni ehulelo yaatthukunle oviha wa mooro, ni owo khuwaawerya owiiraha etthu woohikhala waakhalaha ootaphuwa. Amen.

<sup>42</sup> Okathi mulopwana wala muthiyana onkhalaawe oolikana wira opake nimwaleyo, nimwaleyo na aasitu!

<sup>43</sup> Moone, awo yaahaana okelasa vaikho. Vano nto vairaly'aya siiso, awo yaarisa mmooroni, nto etthu emosa paahi yaairaneiyeye, wehereriwa nno wa mooro waarootthukuwa paahi, khukumihya—otthukiwa mmatatani mwaya.

<sup>44</sup> Imaara sinci-ene, Muluku onninihiya, naitthuka-ru othene ahu ni olumwenku, ootthukiwa, Owo onnihiya weereriwa wa mooro onirweela, vaavo nirinaahu wira ethanlelo. Nto naira vale, etthu emosa paahi wehereriwa onweryaaya wira, okathi Osuulu w'ekeekhai wa Abrahamu omphwanyaneyaaya va—vamakumano wo othanla, ni owo khuthanla omurumeela Muluku, onthikila itthukwelo paahi wira onitaphule. Satana khino onimoovahani eretta. Owo khino onimoovahani etthu emosa, ekina. Munsuwela sayi wira kahi Muluku oohenleni vamakumano, wira oone enamuna xeeni ya e—e—ethanlelo munrowaanyu wira?

<sup>45</sup> Awo yahixintta mukhora wa mooro. Mooro khuwaawerya waapaha. Khiwaakhanle hata wunkha wa mooro mwa awo,

okhala wira awo yaanisuwela wira yaari Osuulu w'Abrahamu, ni yaanimweemererya Muluku ni Masu Awe. Awo yahixintta mi—mikhora sa nwanani, ni mooro khuwaawenrye waapaha, okhala wira awo yahixintta mikhora.

<sup>46</sup> Ohoolo waya, aahikhala mulopwana mmosa, profeta iwe, aaitthaniwa Daniyeli. Owo aamurowa...aahikhalana wehereriwa wira ooniwe sinto aammurumeela Muluku mmosa eekeekhai, wala nnari. Nto vaphiyalyaaya okathi owo, wo woooniwa sinto aammurumeela Muluku mmosa eekeekhai, wala omukokhorela muluku pakawu, owo aahikhootta wira; ni aanivenxa ikurtiina, ni aaninkekela Muluku awe, khula nihiku. Vano owo aahivariwa mwaha wa yeeyo, ni ehukhumu ya malamulo feteraale, vano khuriheliwa mulittini mwa amwatto. Nikhuru na amwatto oovoliwa yaahikhuluma ottuli wawe. Owo iirale exeeni? Owo aahixintta mukhora wa nwanani awe. Amwatto khiyaawenrye omukhuura. Muluku aaveleelinhe Nripu na Mooro, Nlaikha naakhanle eriyari ya owo ni mwatto.

<sup>47</sup> Owo aahixintta mukhora wa nwanani, okhala wira owo aaheereriwa wira ooniwe sinto aamurowa omukokhorela Muluku mmosa eekeekhai, wala okhalana amuluku etuusiya ntero apakawu owo aarowaawe waakokhorela. Vano owo aahivilela wehereriwa, nto khuxintta mukhora wa nwanani. Mwatto hata khaawenrye omukwannya, okhala wira Muluku aari ni yoowo. Natiri a Muluku aahikhala eekeekhai, maana owo aari Osuulu w'eekeekhai wa Abrahamu.

<sup>48</sup> Moise, oh, mutthu mukina muulupale. Owo aahehereriwa, nave, wira ooniwe natiri Muluku aamuvahalyaawe. "Miyu kinookhala ni nyuwo mwarowa-ru iwe." Nto okathi waaphwanyaneyaawe ohoolo wa anamatakiherya yoovaha awe, Yane ni Yampere yaaheererya ovenya n'utakiherya etthu ene yeeyo Moise aarummwe awe wira. Ni Muluku aahimwiihana, ni owo aahisuwela wira aari ole aarummwe wira yeele, nto owo khweemela vale khupaka mwiiriiriya ntoko Muluku aamuhimenryaawe wira iire. Nto va yaaphwanyaneya anamatakiherya, wira yiire etthu emosaru, masi eyo khiyaamuhaaxale Moise. Owo aahikhala oororomeleya wa Masu a Muluku, vano owo khuxintta mikhora, amen, sa nwanani, okhala wira owo aari oororomeleya wa natiri a Muluku, voohicala pani eererya otakiherya yeeyo.

<sup>49</sup> Nisomi xeeni nlo wa khula muKristu! Mwaaawehaka nto munamoona namirima miili, muupuwele paahi owo oneererya otakiha etthu yooloka. Masi, eyo enihimya paahi wira ookhala mmosa okhanle ooloka. Mukhale oororomeleya wa Masu a Muluku! Voohicala exeeni enikhumelela, mmusuke natiri Awe. Ayo, Daniyeli aahikhala oororomeleya ni Masu a Muluku.

<sup>50</sup> Voohicala akavi yaatthuna omutakiha, ni itthu sothene sikina, owo aahikhala oororomeleya. Ni owo aarweenle niwoko,



wira amukumihe Isarayeli wEjitu, ni aaroihe muttethe wa natiri. Nto vaphiyaly'aya okathi wa awo okela muttethe wa natiri, okhuma wEjitu, vale yaaphwanyaneya Ephareya Yookhwa mphironi. Vano owo aahixintta mikhora sa maasi, nto mikhora khuhuleya. Nto ma—maasi yaahisusa, vano Moise khumuroiha Isarayeli mothakoni, mpakha omwaako weiwo Muluku aamurummyawe wira aaruhe-wo. Amen. Owo aahixintta mikhora sa nwanani.

<sup>51</sup> Atithi awe, Abrahamu, yaahimwaakhela natiri uwo, wira Osuulu aya w'ekeekhai waamuxintta mukhora wa nwanani. Vano mikhora sa maasi khuwaleya, ni owo khaawerya olapuwa, ni eyo yaari ephiro ya muteko. Owo aahaana waaruuha aana awo mpakha mwaak'ole. Muluku aahimuhimeerya wira. Ni vale waaphwanyaneya mukhora mphironi, nto owo khuxintta mukhora wa nwanani.

<sup>52</sup> Yoxuwa, okathi vakhani ohoolo waya, okathi aphiyanse-aya oKadexi-barne, weiwo waari ehice ya olamuliwa ya olumwenku okathi ule, Isarayeli aahiphwanya olamuliwa wawe. Ninnaaphwanya Yoxuwa ni Kalebi, ni akina muloko n'anli... ahiiso—ahiiso muloko akina. Mmosa a khula nihimo aahiveleelihiwa wira ahottele muttethe yaarowaaya waakhela.

<sup>53</sup> Nto awo vawoonalyaaya athu ale oorakama aalupale ookorosowa yaaphwanyaneya weiwe, muloko a yaawo yaahikhala oovolola, awo khwira, "Hiyo khaninwerya okuxa. Yootepa. Vano, nkawehani owanani orin'ahu." Masi vatthinke aya wira aruhe ihapari, yaaruuhale ehapari yoohireera.

<sup>54</sup> Xeeni yaakhanlyaaya oruuhaka ehapari yoohireera, Muluku aaleenle, "Miyo kihoovahani muttethe owo; ti wawinyu"? Owo aahaahimeerya wEjitu, "Miyo kihoovahani muttethe ola, owo muttethe wooreera, owo onikhoowa eleethi ni oravo."

<sup>55</sup> Masi okathi awo yoonanse aya owanani wuulupale, muloko aya khutthika khwira, "Hiyo khaninwerya wira."

<sup>56</sup> Aari Yoxuwa, aamaalinhe athu, khwira, "Hiyo ninniweyaxa oxintta. Hiyo ninniweyaxa!" Mwaha wa xeeni? Owo aanweha natiri. Owo aari Osuulu w'ekeekhai wa Abrahamu. Voohicala ele yaari ekhottiheryo, "Hiyo ninoowerya oxintta mukhora, okhala wira Muluku oolaiherya muttethe." Vano owo khuxintta mukhora.

<sup>57</sup> Ohoolo waya, okathi owo waaruuahalyaawe aana a Isarayeli mpakha omuro. Vale waaphwanyaneya, mweeri wa Aprili, muro muulupale, otaphuwaka. Yordani okhuruwaka okhuma mmwaako, ni waahimwareela mmattaponi mowaateleleya. Waakhala ntoko okathi wootepaxa, mwa mwaakha, owo aakhanly'awe okhalaka weiwe. Masi, nnakhala vo, owo aari Osuulu w'Abrahamu. Owo aanisuwela wira aahikhalana natiri, ni owo aari mmutekoni. Muluku aahinvaha yoowoona, moota wo wira, vano owo aahixintta mikhora sa muro. Vahuleiye

aya mikhora, maasi yaahiiseemexa mpakha mmiyaakoni. Nto Yoxuwa ni Isarayeli khuxintta mikhora sa nwanani, khulapuwela muttethe wa natiri, okhala wira Muluku aahaahimeerya wira yiire. Osuulu w'ekeekhai wa Abrahamu!

<sup>58</sup> Axinna alopwana n'athiyana, owo vaphiyalyaawe iwe, Yeriko othene aatekeleliwe makokoro, oorakama saana mpakha ikaaro ttharu sa khavalo saakhanlyaaya otthimakaka vasulu vaya. Yaarowa owerya sayi aIsarayeli ala okuxa ni axoowa oowooliwa, oottottiwa, ni sothene, ni ikopo mi maluku, yaarowa okela sayi mmwe? Masi owo nlelo aari Osuulu w'Abrahamu. Muluku aahinvaaha yoowoona, khimuleela moota wo wira, khwira, "Murumihe nlope." Amen. Ti yeeyo. "Mukhuwele, mweette mpakha vanikokoroni, mikhora sinoomora ohoolo wanyu." Amen! Owo aari Osuulu w'Omwene w'Abrahamu, owo aari mulipa-oowaamini eekeekhai a Muluku. "Mikhora sinoomora ohoolo wanyu. Mukhuwele paahi, ni murumihe nlope. Ti yeeyo tu murinaanyu wira." Nto exeeni yiiraneieye? Mikhora saahimora, vano Yoxuwa aahikuxa muttethe.

<sup>59</sup> Okathi vakhani ohoolo waya, hiyo ninnoona wira nwanani aammwareya ni otthikelaka, nuumala yeeyo, ni owo hata aaheemexa nsuwa vooপুরoni vaya. ntoko saalavunlyaaka voosiisu uwo *Yootikiniha*, owo aaheemexa nsuwa mpakha owo oxintta mikhora sa nwanani awe. Amen. Owo aahisuwela wira nwanani ule aathukumanneru-tho, awo yaahimwaramwareya, ni nsuwa naamutupweela, ni Amori, ni Amalekhi ni akina, othene yaahimwaramwareya, awo yaatthikenle-ru othukumana, ni wiiraana, vano owo aamukattiyamiheya moota wo waamwarya-tho. Ni yaari etthu emosa paahi yaapisiha, owo waari okathi, nto owo aaheemexa okathi. Amen! Amen! Yaahikhala etthu emosa yaamukhottiherya omphwanya natiri, nlo naari nsuwa, ephattu ene yaavirikanya osulu, vano owo khweemexa ephattu. Mwaha wa xeeni? Owo aari Osuulu w'Abrahamu. Owo aanimwaamini natiri a Muluku. Owo aahimweemexa, khukuxa mikhora. Ayo, mulopwana.

<sup>60</sup> Mulopwana ola muulupale, othene aya atthu aalupale. Masi nyuwo moosuwela okathi awo, khula mmosa a awo, vaphiyalyaaya vamukhona wa okhwa, awo othene yaahikhwa. Khula mmosa a awo aahaana okhwa. Okhala wira awo yaari atthu aalupale, "Awo yaahimaaliha e—eyano ya amwatto, ni yaahitthyawa mooro, ni orere wa xoowa," ni sikina, ntoko sinihimeeriwaahu mwa aHeperi 11. Vano awo yaahixintta mikhora sa nwanani, othene omuhiya nwanani mmosa, nto owo waari okhwa. Okhwa waahimmirya khula mmosa a awo.

<sup>61</sup> Vano nihiku nimoso, khurwa Osuulu w'Omwene wa Abrahamu, Yesu Kristu, Mwaana a Muluku; Osuulu w'Abrahamu, mwaha wo waamini. Kahi mwa Isakhi, osuulu w'erutthu; awo yaahivara epantte aya. Masi va onoorwa Mmosa Yoowo ahaayariwe v'ephattu. Va onoorwa Mmosa ahaarwiiye

mwaha w'otthuna w'ekhapa. Va onoorwa Mmosa ooyariwa ni harusi. Mwaana a Muluku, Osuulu w'Abrahamu, Mutthu xeeni muulupale aari ola! Akina a ephattu yaayariwe eyareliwo y'ephattu. Mulopwan'ola aayariwe eyareliwo ni harusi. Owo iirale exeeni okathi Owo orwiiyaawe elapo ya vathi? Owo oomuxintta khula nwanani Satana aarinaawe. Owo ooxintta itthu sothene.

<sup>62</sup> Owo iirale exeeni? Owo orookhuma khuxintta eretta. Khivaaweryaneya okhala eretta vakhiviru va Yoowo; khula nipuro eretta yaaryaaya, Owo aanixintta. Exeeni Owo iiraly'awe vamanlyaawe oxintta? Owo onivanhe ihulelo, amen, airaka, "Sothene sinrowaanyu otthukwa vathi va, Miyo kinootthuka Wirimu." Oh! Amen! Owo ti Osuulu w'Omwene w'Abrahamu, natiri Awe. Erooho Yoowaarya mwa hiyo vano, ni ihulelo, nihelaka mw'ereetani. Owo ooxintta eretta. Eretta khenwerya okhala Ohoolo Wawe. Ni Owo ohimnye wira onivanhe ihulelo wira niireke etthu emosaru, oxintta eretta. "Sothene sinrowaanyu otthukwa vathi va, Miyo kinootthukwa Wirimu."

<sup>63</sup> Nave-tho, ottehattehiwa, Owo aahittehattehiwa mwa inamuna sothene ntoko hiyo. Owo iirale exeeni? Owo aahixintta. Nto Owo onihimenrye exeeni? "Mmukhootheke xetwani, nto owo onimootthyawani." Owo ooxintta eretta mwaha wa hiyo. Owo ooxintta weereriwa mwaha wa hiyo, oopwanyula mikhora; khukuxa ehulelo wa namweererya, khumunnya mulipa-oowaamini, a Osuulu wa Abrahamu, khwira, "Owo aweereryani, mmukhootheke, nto owo onimootthyawani." Oh, wulu! Mmukhootheke!

<sup>64</sup> Owo ooxintta okhwa ni omooroni. Owo oohihimuwa mmurotoni mwaya, iiraka, "Miyo kooxintta. Nto okhala wira Miyo ka mukumi, nave-tho nyuwo mwa akumi." Oh, natiri xeeni! Owo ti Osuulu w'Abrahamu. Owo ooxintta mahiye, khuhihimuwa mmurotoni mwaya, wira nikhalihiwe anaxariya. Okathi Owo ohihimuwaly'awe, Owo aari okhalihiwa wahu anaxariya. Eyo ennikhaliha exeeni? Owo ooxintta eretta. Owo ooxintta okhwa. Owo ooxintta omooroni. Owo ooxintta mahiye. Owo ooxintta weereriwa. Oh!

<sup>65</sup> "Vano hiyo nootepaxa oxintta mwa Ole oniphentale, ni khuvaha ekumi Awe," oryeene Osuulu w'Omwene w'Abrahamu. Ni Erooho emosaru ya Muluku mwa hiyo, yeeyo yaari mwa Yoowo, hiyo nootepaxa oxintta. Khula mukhora wooxinttiwa mwaha wa hiyo. Etthu emosa paahi erinaahu wira okuxaa. Ti wooxinttiwa. Eretta yooxinttiwa. Okhwa wooxinttiwa. Omooroni wooxinttiwa. Mahiye aaxinttiwa. Itthu sothene sooxinttiwa, ni hiyo ninvarelela ihulelo, ni mahala Awe. Munimoova ohela mw'ewaleloni ni wira, "Miyo kinoorwa mwa Nsina na Yesu Kristu"? "Mwaavekele Atithi etthu p'itthu mwa Nsina Naka." Miyo kinnimphenta Owo.

66 Nuuvira iyaakha ikonto piili, iyaakha ikonto piili, ni Owo nlelo ori va eriyari ahu, Muxintta Oowerya okhenre ekuwo ipantte piili, okuxale ikwerere sothene, iretta sothene, sothene mwa Yoowo, ni okuxale iretta sahu khuroiha vamwiikimanyo, ni ikwerere sahu ni iretta sahu, khuxintta seiyo, ni khuhihimuwa wira nikhalihiwe anaxariya, omphwanyaneya mukumi siviralyaaya miyaakha ikonto piili, wira aisooniherye Mmansawe ntoko Yesu Kristu mukumi, eriyari ya Osuulu w'Omwene w'Abrahamu, akhanle alipa-oorithi a itthu sothene. Oh, wulu! Ale nuumala, ovira mowehereriwani, natiri a Masu! Mwaaweryaka waamini Masu, nto ni nyuwo mwa Osuulu w'Abrahamu. Ti siiso muniphiveryaanyu Yaawo.

67 Mwaahiweryeke ovilela wehereriwa iwo wa Masu, nto nyuwo mwahoverya-ru Yaawo, waanyiherya Yaawo vakhani, vannoorikelani waamini Yaawo, yookhala etthu emosa wala ekina, khamunwerya waamini Yaawo, weeso muhirwe muliinyani mwa mavekelo. Miyo nkaarowa hata omwaattamela altaari, mpakha ophwanya mahala oophiyerya wira kisuwele wira Masu a Muluku t'ekeekhai.

68 Nto nyuwo mwaphiyerya-ru ovikana ettiyelo eyo ya ohaamini, vano munookhalana ihulelo mmatatani mwanyu, sa mookhwaani, omooroni, ni mahiye, okhala wira mookhalana Muxintta ooxinttenleni nyuwo. Vano muhaana aHeperi 13:8, annihimeerya wira, "Yesu Kristu mmosaru nsana, olelo, ni mahiku othene." Ninwerya sayi hiyo wira yeeyo?

69 Atthu olelo aniira, "Oh, ahe, kinimooleelani, Owo ori mwa e—enamuna emosa, Owo ti yoowo."

"Owo mmosaru," Bibilia oohimya.

"Oh, ahe, Owo khoniira olelo ntoko siiraawe."

70 Ninniphwanya eyo naanaano va, okathi onoonahu Masu Awe olipiheriwa. Eyo eniira exeeni? Enoorihelela-tho Yaawo ottuli waya. Amen.

71 Osuulu w'ekeekhai wa Abrahamu onnaamini Yaawo. Awo annisuwela Yaawo. Nto Owo onikhala, ohiy'ula, ntoko Owo saakumanne awe n'Abrahamu osulu wu mahiku a Lothi khupaka mwiiriirya ole, ntoko Owo siiraly'awe amuleelaka Saara etthu aahimyaawe ottuli Wawe. Yesu aahihimya, Osuulu w'Omwene w'Abrahamu, wira Ekereja yaarowa woona etthu emosaru yeeyo okathi vakhani ohinatthi Orwa Wawe. Exeeni iyo? Ehaana wiiraneya. Muluku oohimya. Yesu Kristu aahiliphiverya ni aahihimya wira yaarowa okhala siiso, nto hiyo nri va olelo, siviraly'aya iyaakha ikonto piili, ninnimoona Owo eriyari ahu, nlelo Muxintta Oowerya! Owo ooxintta okhwa, omooroni, mahiye, sothene so waamini s'olava; ookuxa Masu...?. . .owo. Ayo.

72 Owo ohimye wira, "Nyuwo mwakhala mwa Miyo, nave Masu Aka mwa nyuwo, nvekeleke etthu entthunanyu nto

munoovahiwa.” Yaari exeeni iyo? Masu, Kristu, Yaawo ari mmurimani mwanyu. “Nyuwo mwakhala mwa Miyo, Masu Aka yakhala mwa nyuwo, vano mooxintta itthu sothene okhala wira Miyo kooxintta mwaha wa nyuwo. Nyuwo mwakhala mwa Miyo, mwaaweryaka okiwa saana, mwaaweryaka okhala mwa Miyo. Ole onikaamini Miyo, onikaakhela Miyo; kahi wiipaka waamini paahi, masi onwerya waakhela. Ole oniwa Masu Aka, oniwa saana Masu Aka, ni onimwaamini Ole okirumme, ookhalana Ekumi ehinimala; ni khanrowa ottehattehiwa, wala olamuliwa, masi oovira mookhwaani khuphwanyana Ekumi.” Owo ori vo, Muxintta Oowerya!

<sup>73</sup> Owo ori vaava olelo, mmosaru nsana, olelo, ni mahiku othene. Owo ori va avaraka ohoolo wa Osuulu w’Abrahamu, wiitthaniwe okhuma oPapilooniya, wiitthaniwe okhuma oSotoma, wiitthaniwe okhuma molumwenkuni, khuvalaanihiwa, omooniheryaka natiri Awe voolikana ni vekeekhai. Nuuvira miyaakha ikonto piili, va Owo ori eriyari ahu, ohiy’ula, Muxintta ole Oowerya, Masu a Muluku Yaawo anwerya olamula soowuupuwela siri mmurimani, ni soothuna saya. Exeeni iyo? “Osuulu anyu onooxintta mikhora sa nwanani aya.” Exeeni iyo? Owo Osuulu w’Abrahamu, Osuulu w’Omwene, waaminiki Masu. Ni Masu ti—Masu ti Muluku.

<sup>74</sup> Vano noonaaka yeela, hiyo pooti okhuwela ni yaawo, ntoko mulipa-oolepa a khalayi:

Akhalaka, Owo ookiphenta; akhwaaka, Owo  
 ookoopola;  
 Avithiwaka, Owo ooroiha itampi saka  
 ottaiwene;  
 Ahihimuwaka, Owo ookhaliha naxariya  
 mahala-ene voohimala:  
 Nihiku nlo Owo onimoorwa—oh, nihiku  
 noovuwa!

<sup>75</sup> Ookhala mutthu iirale, “Nyuwo munimuuluvala, mmiravo.” Nkinwerya okhottiherya eyo.

<sup>76</sup> Kinnikhala okhuma okathi waary’aka mwammiravo, muteko aka mmosa paahi onkhalanakaaka woona Orwa wa Yesu Kristu. Miyo koovahererya ekumi aka mwaha wa yeeyo. Nlelo kiri vapulpitu, ntoko mulopwana mutokweene, kinimwaamini Wahala mmosaru yoowo, ni etthu yuulupalexa kikhanlyaaka wuupuwelaka omoona Yesu Kristu arwaaka okhuma wirimu wira owaakhele ale Awawe. Muluku, vano yawaka. . . Khivanxankiha ninweryaahu wiipa:

Atthu othene ekhomase owerya wa Nsina na  
 Yesu!  
 Malaikha emore ekokhoraka;  
 Niruuhiwe nleha na omwene,  
 Nto munwarihe Yoowo ntoko Pwiya a othene.

<sup>77</sup> Mwaha wa xeeni? Owo ti Muxintta Oowerya. Nyuwo mwakhala mwa Yoowo, nyuwo muri Mmasuni. Owo oirale, “Nyuwo mwakhala mwa Miyo, nvekeleke sothene sintthunaanyu.” “Sothene sintthunaanyu,” tthiri wira khula mukhora woointtiwa. Vano ninoowerya wira:

Maana khula natiri Muliiwuruni t’awaka,  
Khula ekapiitulu, khula eversikulu, ni eliinya.  
miyo kinlipa mwa Masu Awe a oMuluku,  
Maana khula natiri Muliiwuruni t’awaka.

<sup>78</sup> Apatthani, munnisuwela etthu enihimya yeeyo? Natiri othene Muluku omulapenlyaawe Abrahamu, natiri othene olavuliwe ni maprofeta, natiri othene Yesu Kristu omuhimyaawe wa nihiku nla, Owo ori vaava wira amulipiherye ni wira ooniherye wira Owo onkhala voohimala-tho. “Osuulu anyu onoointta mukhora wa awanani.”

<sup>79</sup> Waaphiyaka okathi w’okhwa. Nyuwo muniira, “Ankhi yeeyo?” Nyuwo nlelo mookhalana Ekuxeryo Paulo ohimyaawe. “O mahiye, oxintta wanyu ori yayi? O okhwa, mpwino anyu ori yayi? Masi nimuxukhuruku Muluku, Yoowo onnivaha oxintta mwa Muxintta ole Oowerya, Yesu Kristu.” Oh!

Malaikha emore ekokhoraka;  
Niruuhiwe nleha na omwene,  
Nto munwarihe Yoowo ntoko Pwiya a othene.

<sup>80</sup> Ohiy’ula, sivinryaaya miyaakha ikonto piili, hiyo ninnivenya nlelo, wira nimoone Owo, Muxintta Oowerya Yoowo okhenre ettiyelelo yeeyo yaanivalaaniha ni khula natiri a Muluku, nto hiyo nootepaxa oxintta mwa Yoowo. Nivekele.

<sup>81</sup> Tithi a Wirimu, neemenle-ene va, ohiyu ula, Ohoolo wa Erooho Yoowaarya, Mutthu ule muulupale a Yesu Kristu mwa mukhalelo wa Erooho, Yoowo aalaiherye orwa mwa Osuulu w’Abrahamu, Osuulu w’Omwene, hiyo ninnivekela, O Muluku, akhala mulopwana wala muthiyana, mmiravo wala mwaaruusi, mu, ohinoosuwelani, awo aakhalana ohoverya ni otheipiwa mmuruni mwaya, mwaha wa Masu a Muluku, sinto Awo Ekeekhaii wala nnari, O Muluku Muulupale, Ole ommanne natiri, murwe ohiy’ula! Ookhala natiri mmosa muulupale Nyuwo mummanne anyu, Pwiya, Nyuwo munniwerya ommaliherya natiri uwo, Nyuwo muhimmye wira, “Ole onikaamini, miteko Miyo sinvar’aka nave-tho owo onoovara; suulupalexa ovikana iya owo onoovara, maana miyo kinrowa w’Atithi.” Tithi Muluku, hiyo ninvekela wira Nyuwo mulipiherye Masu Anyu.

<sup>82</sup> Aakhala aana anci-ene a Abrahamu va ohiy’ula, anwereiwa. Oh, xetwani orimwaattiyela vamukhora; awo arooheliwa mpaani, vano ihulelo khurukunxiwa, ni khwiiriwa, “Vano muhaana okhwa; murina eretta ya murima. Mookhalana *ela, ele*, wala *ekina*, ni muhaana okhwa.”

<sup>83</sup> O Muluku, nlope na yopeeli nirume, ohiy'ula, na Ehapari yooreera, wira khula epottha ewerye okhuma yootaphuwa! Yesu Kristu ooxintta mikhora iyo. Hiyo ninvarela ihulelo mmatatani mwahu. Oh! "Mwa Nsina Naka anoowoomola axetwani. Mwaavekela-ru Atithi etthu p'itthu mwa Nsina Naka, Miyo kinimwiira. Ole onikaamini, miteko Miyo sinvar'aka nave-tho owo onoovara. Masu a Muluku t'owiitha ni ooweryaxa onvikana xoowa oniitha ninno-ninno, anthikila mpakha vankumana makhuva, ni annilamula soowuupuwela siri mmurimani."

<sup>84</sup> "Ni ntoko saaryaaya mahiku a Nowe, siiso-tho enookhala orwa wa Mwaana a mutthu, tthiri awo yaanilya, yaaniwurya, yaanithela, yaanithelihana; itthokiheryo suulupale sa itekelo." Nto hiyo ninniweha olumwenku, "Sinookhala ithoonyeryo, itthu soowoopiha wirimu (iya ti itisku sinvava), itetere s'elapo mapuro manceene, ephareya erumaka (mawipi maalupale), mirima s'atthu sinoovolola (woova), ohiiwanana wa ilapo, sooxankiha s'okathi."

<sup>85</sup> "Ni ntoko saaryaya mahiku a Lothi, siiso enookhala okathi onirwaawe Mwaana a mutthu." O Muluku, murwe ohiy'ula nvarihe muteko Masu Anyu, murwe ohiy'ula ni muttittimihe waamini w'ana a Abrahamu. Mwa Nsina na Yesu Kristu hiyo ninnivekela. Amen.

<sup>86</sup> Apwiya yooreeriheni, vanci-ene. Nkinrowa wiihana waltaari okathi ene yoola. Kinrowa woohiyeryani yeenyu. Miyo kinoona wira, imaara sinci-ene, wiihana wira murwe waltaari... Miyo kinnaamini ni yaawo. "Masi othene ale yaakhenle, yaahipatisiwa." Ti yeeyo, "Othene ale yaamwaakhenle Yoowo." Ninrowa waavekelela aretta.

<sup>87</sup> Kaamuwerya olavula va ohiyu wothene. Nyuwo mwa muthukumano wooreera. Masi ele enihimyaaka ti ntoko mutthu paahi; masi miyo kahimya-ru Masu Awe, vano awo kahiyo moolumo aka, awo Masu Awe. Miyo kahimya-ru etthu, nto Muluku khuhilipiherya, vano awo yaari masu aka. Miyo kaahimiyaka Masu Awe, nto Owo khulipiherya, taani natampi ole mulopwana wala muthiyana, mmiravo wala mwaaruusi, onrowa okhuma ni wira Awo kahi siiso?

<sup>88</sup> Yesu, aahihimya okathi Owo aapanke awe itthu iya, awo khwira, "Mulopwan'ola nahako. Owo xetwani!" Nahako, khula mutthu onnisuwela wira nahako xetwani. Owo khwira, "Owo nahakoo." Masi mootoko omoona nahako alaleyaka Ehapari yooreera? Mootoko omoona nahako owoomolaka axetwani? Nnari, vekeekhai, awo khaniira.

<sup>89</sup> Owo khwira, "Vano, Miyo Mwaana a mutthu kinimoolevelalani yeeyo. Masi okathi Erooho Yoowaarya enrwaaya, olavula nveehaka Yeeyo khonkhalakhala oleveleliwaka olumwenku ula nnakhala olumwenku onrwa,

okhala wira iwo onkhala wiihana muteko wa Muluku erooho yootakhala.”

<sup>90</sup> Muluku animorele ikharari, ohiy’ula, ni kinvekela wira Muluku akhuruwe ni alipiherye Masu ala ohoole wanyu.

<sup>91</sup> Munna mulopwana, muthiyana, ola munepa aka. Kihaana okumana ni Muluku. Miyo kinthokorerya etthu enooleelakani. Muluku onookikhaliha oowaakhula mwaha wa yeeyo. Eyo ekeekhahi. Kaarowa ophwanya-ni miyo weemela va ni ohimya itthu iya kaasuwenle wira kaalamulela munepa aka omooroni?

<sup>92</sup> “Yookhala ephiro enooneya oreera wa mutthu, masi emalelo aya iphiro sa mookhwaani.” Muluku khanimphavela hata mutaphuleli. Ntoko sihimmyaka, Owo onitaphulela Masu Awe Mwaneene.

<sup>93</sup> “Osuulu w’Abrahamu onooxintta mukhora wa nwanani.” Munnaamini?

<sup>94</sup> Kaawerya woovonihani, miyo kaamwiira. Kristu ohoovonihani. Etthu emosa paahi, mookhalana ehulelo mmatatani mwanyu. Ehulelo eyo ti waamini wanyu, wira mukuxe eyo. Muhule, ohiy’ula, khamunthuna? Okathi Owo onrwaawe eriyari ahu, Muxintta ole Oowerya oxinttale eretta yothene, ni onrwa va ni owoonihani wira Owo ohiira, maana Owo nlelo ti Masu. “Vano Masu annilamula soowupuwela siri mmurimani.”

<sup>95</sup> Ettikitti xeeni ya mavekelo? B, emosa mpakha... Naapacenrye vayi, ohiyu ule? [Ookhala oniira, “Emosa.”—Mol.] Nrowe nipacerye okhuma miloko mithanu. T’ani orina ettikitti ya mavekelo B, miloko mithanu? Nvenxe ntata. Ettikitti ya mavekelo B. Naapacenrye emosa, ohiyu ule, vano ninrowa opacerya miloko mithanu, ohiy’ula.

<sup>96</sup> T’ani orina, B, B, miloko mithanu? Nvenxe ntata. Ettikitti ya mavekelo B, miloko mithanu. Enihimya wira khekhanle vaava? Mookhalana? Vaareera, B, miloko mithanu. B, miloko mithanu ni emosa, taani orina yeeyo? B, miloko mithanu ni emosa, vaareera. B, miloko mithanu ni piili, taani orina B, miloko mithanu ni piili? Vaareera, mookhalana. B, miloko mithanu ni tthaaru, miloko mithanu ni xexe, murwe nno. Miloko mithanu ni xexe, miloko mithanu ni thanu.

<sup>97</sup> Mwan’aka onoorwa va, okathi vakhani kihinatthi ovolowa, ni onootakanxa nikuttha na ittikitti. Ni munnoonna moota sikhanyaaya, emosa *va* ni emosa *vale*? Awo khansuwela. Mwaamuwerya orwa ethataanelo ela *va* khukuxa emosa, mukina khukuxa yanamuloko, mukina miloko miili ni piili. Hiyo khanisuwenle siryaaya-vo, masi, nipuro pi nipuro siryaaya.

<sup>98</sup> Vano niitthanne kavi? Thanu, xexe? B, miloko mithanu. Yaari B, miloko mithanu, khiyaari yeeyo? [Ookhala oniira, “Ayo.”—Mol.] B, miloko mithanu mpakha miloko mithanu ni



thanu. Miloko mithanu ni thanu na mosa, miloko mithanu ni thanu na piili, miloko mithanu ni thanu na tthaaru, miloko mithanu ni thanu na xexe, miloko mithanu na mosa. Vano nrowe noone, emosa, piili. . . Nwaalake, Billy, ni hiyo. . . Miloko mithanu na mosa, miloko mithanu na piili, awo evenye toko, xontte. B, miloko mithanu mpakha miloko mithanu na miili, miloko mithanu na miili ni thanu. Nwaalake, Munna Roy, xontte, kilavulaka ni muthukumano.

<sup>99</sup> Akavi iwo vano nwehaka epant'ila, ni nyuwo muhirina ettikitti ya mavekelo?

<sup>100</sup> Muupuwele, Yesu oohimya, “Miteko Miyo sinvaraaka nave-tho nyuwo munoovara.” Eyo ekeekhaii? Eyo ekeekhaii. Nyuwo munnaamini yeeyo? Osuulu w'Abrahamu ohimnye siiso.

<sup>101</sup> Bibilia onihimya, wira, “Owo ti Namukuttho Muulupale.” Aheperi, kapiitulu 4, “Owo ti Namukuttho Muulupale onwerya omoriwa ikharari mwaha wo otteettheya wahu.” Munnaamini yeeyo? Vakhala wira Owo mmosaru nsana, olelo, ni mahiku othene, Owo aarowa wira sayi?

<sup>102</sup> Aahikhala mwamuthiyana mmosa, mBibiliani, nwiriyana enihimyaaka. Mwamuthiyana mmosa, mBibiliani, khino owo khaarina ettikitti ya mavekelo; masi owo aahihimya mmurimani mwawe, “Miyo kawerya-ru omukwannya Mulopwan'ole, miyo kinnimwaamini Ole.” Owo aahimaliha sothene aarinaawe, nave mame- . . . ni mameetiku. Awo khiyaawerya omukhaliherya. Mwah'awe waari muulupale. Awo khayaawerya omukhaliherya. Masi owo aahaamini wira Muluku ammukhaliherya. Vano owo aahikwannya mukerekhere Mwawe, mwa yoowara Awe.

<sup>103</sup> Nto Owo khwira, “Kinnoona wira ikuru sookhuma mwa Miyo.” Eyo ekeekhaii?

<sup>104</sup> Munnaamini wira Owo mmosaru, ohiy'ula? Munnaamini wira Owo ori vaava? Akavi anaamini wira Owo oohihimuwa mw'alipa-ookhwa? Vano muniwerya sayi wooniherya wira Owo oohihimuwa mw'alipa-ookhwa?

<sup>105</sup> Woohikhala khalayi, mulopwana mmosa muPatista oosuweliwa aahikirweela, nto owo khwira, “Munna Branham, miyo kaahixinttiwa—kaahixinttiwa, emaara emosa, ni Mmaka mmosa aahimye ela. Owo iirale, 'Vakhala wira Owo oohihimuwa, Owo ohimye wira aamwiira etthu emosaru. Nrowe nimoone Owo airaka.” Moone, awo anaamini wira Owo khohihimunwe.

<sup>106</sup> Masi hiyo ninnaamini wira Owo onniira. Hiyo ninnaamini wira Owo oohihimuwa mw'alipa-ookhwa. Khekanle hata etiini ekina molumwenkuni enwerya wooniherya wira mulipa-opacenrye mukumii, ohikhanle oKristu. Nto enamuna emosa paahi Muluku okhanlyaawe olipiheryaka Yeeyo, enkhala mwa ale anaamini Yeeyo, maana eyo t'inamuna emosa paahi Muluku ommaliheryaawe Masu Awe, t'ale anaamini Yaawo.

107 Vano epakiwaka eliinya ela yaamukhaani ya mavekelo va, nkisuwenle akavi ninrowaahu waacalela, miyo kintthuna khula mmosa a nyuwo, okhale voopuroni vawe, mukhale vanipuroni vanyu, muhivela-vele, nwehe epantte ela nno nvekele, mwiire, “Pwiya Yesu, miyo kinnaamini.”

108 Muupuwele, Owo aahikileela, “Mwawiiharu athu owaaminini; vano nto khukhala naxariya mwaavekelaka.” Enkhala siiso epantte ti epantte elapo ela, nno ni iwe, mwa miyaakha muloko ni mithanu, khiyaavo emaara emosa evonnye aya. Khekhanle ovonyaka.

109 Muluku, etthu emosa Muluku ohinweryaawe wira, ovonya. Owo ohaana omaliherya Masu Awe. Miyo kinnaamini yeeyo. Kinnaamini iyo siiso ntoko miyo...ovikana kinaamini aka wira keemenle va, ovikana kinaamini aka wira kiri empa ela; yaamuweryaneya okhala ekerikeri, yaamuweryaneya okhala yooloha. Mmunepani mwaka, miyo koosuwela wira Yesu Kristu Mwaana a Muluku mukumii. Ni nyuwo muryeene Osuulu w’Abrahamu, nyuwo mukhwaaka mwa Kristu, nyuwo mwa Osuulu w’Abrahamu.

110 Vano awo aakhalana maleeso kamosa-kamosa va. Onniphwanyiwa muraarelo ni yeela, athu anaamini. Vano nrowe nuramihe muru, awo yiilikanyihaka ni naavekelele ala.

111 Tithi a Wirimu, hiyo ninnixuttihwa mBibiliani, ni aakhala athu va anaamini wira Masu othene Nyuwo muhimaly’anyu Ekeekhaii. Pwiya, imaara sikina awo anniveveleya ni annikuxa ehulelo mpakha vamwiitheni va ewalelo, evonyaka, ni ekwerethaka, masi annaamini wira ori vaavo. Mwaahiye etthikele eroihaka, mpakha ephwanye, maana ori vaavo. Vano ehulelo eyo ti ehulelo y’ekeekhai, “Mwaaweryaka waamini, sothene sinniweryaneya.” Okhala wira nsipo nnimwiipiwa vano, ahiiso orumihiwa.

112 mBibiliani enihimya wira, “Paulo aahikumihya veerutthuni vawe maleeso ni ikuwo, ni aanaaveleliherya aretta ni ooriipiwa murima, ni irooho sootakhala saanaahiya athu, vano awo yaanivonihiwa.”

113 Vano, Pwiya, hiyo noosuwela wira Paulo Oowaarya ori ni Nyuwo. Masi, khaari yoowo; mwaari Nyuwo, Pwiya, Kristu mwa yoowo. “Nkihiyo miyo kinkhala, masi Kristu onkhala mwa miyo,” owo oohimya.

114 Nto vano wa nloko nla, Nyuwo nlelo mwa Kristu, olelo, ntoko saaryanyu nsana. Nto kivekelelaka maleeso ala, kikwanyaka, miyo kinvekela wira Nyuwo mmuxintte nwanani othene. Mwaavahe waamini, wira asuwele wira nwanani ooxinttiwa.

115 Nto emaara emosa, Ephareya Yooxeerya, ntoko nimanlyaaahu olavula, yaahimukhoottiherya Isarayeli omphiyerya natiri, ni awo yaari mmutekoni. Nto mulipa-oolepa mmosa oohimya, wira, “Muluku aahiweha vathi ni maitho ooviruwa, mwa Nripu nle na

Mooro, vano ephareya khututhuwa khuhula mikhora saya, vano awo khulapuwa.”

116 Nwehe vathi, ohiy’ula, mwa Ephome ya Yesu Kristu. Ni wira, maleeso ala yapweheriwa aretta, nwanani oone waamini wahu, ohiy’ula, nivekelaka nivekelo nla na waamini wa awo. Ni wira khula mmosa avuluxiwe, mwa Nsina na Yesu Kristu. Amen.

117 Vano kintthuna nwiriyane saana. Ole onkhapelela miikoro va, aacererye evuluume. Okhala wira, Erooho Yoowaarya yairaru yeela. . . nkinihimya wira Eyo enimwiira.

118 Vano khula mutthu onoorwa va ni onoohimeeryani wira aakhalana owerya wo waavoniha aretta, muhaamini. Owerya ori wothene mwa Kristu. Owo ti Muxintta, kahi nyuwo ni miyo. Hiyo ninkupali paahi etthu Owo iiralyaawe. Khaavo orina owerya wo woopola wala ovoniha.

119 Khula mutthu molumwenkuni, ehisapo yoolinwva. Yoovekeliwa yoolinwva. Yaari sayi? “Owo ohaaxeriwe sootheka sahu, makhwatta Awe t’anivoninhe.” Yawinyu—ovona wanyu wooliveriwa. Woopowa wanyu wooliveriwa. Mookhalana waamini wo orwa, okupali? Ti yeeyo tu. Mwakhala Osuulu w’Abrahamu, mookhalana. Muluku oohimya. Yookhala etthu mwa nyuwo enihimya wira eri vaavo, ni yookhala.

120 Vano yoovaha exeeni? Yoovaha okhuma ni orowa waavoniha athtu? Nnari. Yoovaha wiikumihha mmansinyu mphironi, wira Muluku oovareleni muteko.

121 Vano Owo aahihimya wira, ethoonyeryo yookiserya, voolikana ni Yesu Kristu, “Ntoko saaryaaya mahiku a oSotoma, okathi vakhani ohinatthi opahiwa.” Kahi sihinatthi itthu sikina wiiraneya, Ehapari yooreera yaahilaleiwa ni Lothi, ni sikina; kahi yeeyo. Masi okathi vakhani ohinatthi opahiwa, Muluku aahikhuruwa mwa mukhalelo wa mutthu, khukilaathi ni Ekereja yoothanliwa, Abrahamu nnikhuru nawe, yoowo aarina natiri.

122 Vano muupuwele, Osuulu w’Abrahamu paahi t’onaakhela ela. “Woohala okathi vakhani olumwenku khunrowa-tho okoona,” Yesu oohimya. “Nyuwo munookoona, maana Miyo kinookhala ni nyuwo, mwa nyuwo, mpakha omala olumwenku.”

123 Masi Owo oolaiherya, okathi vakhani Owo ohinatthi otthika, “Ntoko saaryaaya oSotoma,” nkawehani etthu Sotoma onaakhelaawe; nkawehani etthu Ekereja yoothanliwa enaakhelaaya, khwira, “siiso enookhala orwa wa Mwaana a mutthu.” Muluku owiisooniherya mwa mukhalelo wa mutthu, yoowo ni ettuli Awe yoorukunuwela eheema, aahimye etthu Sara iiraly’awe muhina mw’eheema. Athtu othene ansuwela wira eyo Ekeekhaii, evenxe matata. Eyo ekeekhaii. Vano Owo oolaiherya. Hiyo nri okathi wookiserya. Vano muupuwele, eyo yaari etthu yookiserya yaakhumelenle; nto olumwenku w’Amalapo waahipahiwa, Sotoma, ni mwaana aalaiherye

aahirwa vanlakani. Hiyo nimmuwehererya Mwaana olaiheriwe, Mwaana a Muluku.

<sup>124</sup> Hiyo nri va. Muluku atthukule maitho anyu. Miyo nkinsuwela etthu ekina y'ohimya. Owo atthukule maitho anyu.

<sup>125</sup> Vano Tithi a Wirimu, miyo ka oohiwerya, miyo ka nikuttha na oloko Nyuwo muupalyaanyu, khuhela va. O Muluku, ohiy'ula, kiwerye, okhalana mahala Anyu ni Mukhalelo, wira mukhale Nyuwo munrumeela ikulu iya sikhaani sa oloko Nyuwo murinaanyu va. Wira ale, Pwiya, ale Nyuwo muwiihanenlyaanyu Ekumi Ehinimala, ni khino ahikupanli nlelo, awo awoone anatiri ala. Khino awo yiixuttihiwe wira yaari ya nihiku nikina, masi va eri mBibiliani. Mulipiherye Yeeyo, Pwiya. Iwo p'utaphulela Wanyu Yeenyu. Khentthuneya yoovikana yeeyo. Nyuwo mwairaru siiso, vano awo animoona wira Masu t'ekeekhai. Munivahe, Tithi. Hiyo ninniivahererya wa Nyuwo.

<sup>126</sup> Khula mutthu va, Pwiya, arumeele waamini wawe, ohiy'ula. Khula mempuru a Nihimo na Abrahamu, mwa Yesu Kristu, akhalane waamini, ohiy'ula, ni akupali Mukhalelo Anyu. Nto hiyo nnimoovahani nttotopelo. Amen.

<sup>127</sup> Vano, ela ti yo- . . . Vano ela ti yootikiniha. Kintthuna wira mukikhaliherye vano, mukivekelele. Mukilaathi mmaale saana, muhivira-vire. Mukilaathi mmaale, nvekele.

<sup>128</sup> Vano, moone, enoorukunxa onamalaleya ehapari, wira yoomaaliheni mwa enamuna emosa Erooho ya Muluku ekhanlyaaya wookuxakani voomalela mpakha mphimelo mukina.

<sup>129</sup> Vano va eemenle mwali ola . . . Murwe nno okathi vakhani, muhano. Nto paahi . . . Eri saana siiso, wira kihisuse vamiikoroni va. Moone, nkisuwenle etthu eniiraneya, nyuwo moone, vano nto imaara sikina, moosuwela . . . Vano enamuna emosa paahi ya miyo osuwela, eri—eri mmiikoroni, moone, ni amphavela ovara iwe, ni nkinsuwela tu exeeni.

<sup>130</sup> Vano hiyo n'amalapo mmosa ni mukhw'awe. Miyo nkinoosuwelani, nkinatoko owoonani kookhalaru. Masi nyuwo mwa ootepaxa oyeva okivikana miyo. Ni hiyo alakela niyariwe imiilya soorakamelana, ni miyaakha voovirikana. Ola okathi ahu woopacerya okumana. Eyo ekeekhai? Yakhala yeeyo, nvenxe ntata wira muthukumano woone. Vano, owo muthiyana paahi eemenle va.

<sup>131</sup> Nkawehani, muiroihe eyo mwa Yoolempwa. Nrowe nimukuxe Yohani Oowaarya 4. Khula mmosa a nyuwo musome mwarowa owaani. Kahi—kahi wira muthiyana'ola enamuna yeeyo ya muthiyana; miyo nkisuwenle. Ni nyuwo moosuwela wira miyo nkiihiyo Yesu Kristu. Masi Owo ori vaava. Ti Yoowo. Vano Erooho Awe enittikitthelaka, enniwerya wuupulula mukattyamiho awe,

ntoko Owo saamwiireny'awe muthiyana veehimeni. Etthu emosaru.

<sup>132</sup> Nto, mwa yeeyo, vaavo anamukuttho ni akhulupale a nihiku nle, yiiralyaaya, "Mulopwan'ola nahako, wala xetwani, Pelizepuli."

<sup>133</sup> Muthiyani'ola iirale, "Napwiya, kinoona wira Nyuwo mwa profeta. Hiyo noosuwela wira Mesiya onimoorwa, nto eyo enrowa okhala ethoonyeryo Awe."

<sup>134</sup> Vano, akavi ansuwela wira eyo ekeekhaii? Ahe, vakhala wira Owo mmosaru nsana, olelo, ni mahiku othene, eyo khiyaarowa okhala ethoonyeryo Awe ohiy'ula? Owo aahihimya wira yaamukhala, okathi vakhani ehinatthi emalelo y'okathi? Vano moone vakhala wira Owo onnimmaliherya natiri Awe Osuulu w'Abrahamu.

<sup>135</sup> Vano akhala mutthu mu onuupuwela wira ti yoovonyeya, murwe va mwiire etthu emosaru. Yaahikhale, vano muhahimye etthu ya yeeyo. Mookhalana oreeriwa.

<sup>136</sup> Vano, mwa Nsina na Kristu, miyo kinkuxa khula erooho vathi va weettiherya waka, wa ovuwa ni nttittimiho wa Muluku.

<sup>137</sup> Miyo kihaana olavula ni nyuwo, okathi vakhani, mwamuthiyana. Nyuwo moosuwela, Pwiy'ahu aahilavula ni muthiyani'ole veehimeni. Owo iirale, "Mukiruuhele maasi." Owo iira exeeni?

<sup>138</sup> Vano nwehe, Owo oohimya, mwa Yohani Oowaarya 5, "Vekeekhaii, vekeekhaii, kinooleelani wira, Mwaana," aari Yoowo, erutthu, "nkinwerya wira etthu mwa Yoomi," voolikana paahi ntoko Owo saawoonaawe Atithi yiiraka. "Ele Atithi aniiraaya, Awo annimooniherya Mwaana. Moone, Miyo nkinwerya wira etthu mwa Yoomi, masi ntoko siniwoonaaka Atithi wira." Vano, Yesu khaapanke nnakhala mwiiriirya mmosa mpakha Muluku omooniha Owo ni yoowoona; kahi omuhimeerya owaruni Wawe, masi omooniha. "Ele miyo enoonaaka," kahi wiwa, "owoona Atithi yiiraka." Ti yeeyo yaamukhalaha Owo Profeta ntoko Moise, ntoko Moise saahimyaawe. Vano okathi Owo—Owo aanaasuwela Atithi . . . Owo aari mu . . .

<sup>139</sup> Owo aarowa oYeriko, masi Owo aanitthuna ovira oSamariya, vano Owo khuphiya epooma y'oSikari. Nto vano moone, aSamariya yaaninwehererya Mesiya.

<sup>140</sup> Ayuta yaaninwehererya, vano Owo aahiwooniha ethoonyeryo Awe. Filipe, Natanayeli, Petru, vapakiwaaya ethoonyeryo eyo, awo yiirale, "Nyuwo mwa Mwaana a Muluku."

Rabbi iirale, "Mulopwan'ola Pelizepuli."

<sup>141</sup> Masi vano muupuwele, Amalapo, hiyo, hiyo naari Anklo-Saksoni, hiyo—hiyo khanaamuwehererya hata Mesiya. Hiyo

naari apakawu, aRooma, ni sikina. Hiyo khanaamuwehererya hata Mesiya. Owo onaarweela paahi ale aninwehererya Yoowo.

<sup>142</sup> Masi aSamariya yaaninwehererya, tivo Owo aahaana ophiya wa yaawo, oSamariya. Owo aahikilaathi veehimeni. Mwamuthiyana mmosa, alakela a munnuwelo anyu, khurwa. Owo aari muthiyana mmosa oohifayi. Nyuwo moomusoma wahala owo, woona waka. Nto Owo khwira, “Muthiyana, mukiruuhele maasi.”

<sup>143</sup> Owo khwira, “Oh, kehiyo elimalelo wa Nyuwo, muYuta, onvekela muSamariya yeeyo.”

<sup>144</sup> Owo khwira, “Masi mwaamusuwenle Ole onlavulanaanyu, mwaamukivekela Miyo maasi.”

<sup>145</sup> Ovaanela waahikelela ohoolo. Vookiserya, Owo khusuwela vatthu vaari mulattu awe. Munnuupuwela yaari exeeni? Owo aahikhalana axiyya anci-ene. Nto khwira, “Rowani mwaaruhe aiy’anyu, murwaase va.”

Owo khwira, “Nkirina hata mmosa.”

<sup>146</sup> Khwira, “Moohimya saana,” khwira, “okhala wira mwaahikhalana athanu, nto ole munkhalanaanyu vano khahiyo awinyu.”

<sup>147</sup> Owo khwira, “Napwiya, kinoona wira Nyuwo mwa profeta. Hiyo noosuwela wira Mesiya onnoorwa, Owo onoonileela itthu iya.”

Nto Owo khwira, “Miyo ka Yoowo.”

<sup>148</sup> Owo aahihiya muno awe wa maasi, khutthimakela opooma, khwira, “Murwe, mmoone Mulopwana mmosa Yoowo okihimeenrye kiralyaaka. Kahi yoola Mesiya?” Awo yiira ehikhalanne profeta mwa miyaakha imiya sene. Nto va aari Mulopwana mmosa aahimya wira aari Mesiya, ni aahooniherya okhala pro—profeta, ni aahooniherya ethoonyeryo ya Mesiya.

<sup>149</sup> Eyo yaamurowa owaaminihani etthu emosaru, Owo aairale-ru etthu emosaru, okhalaka wira Owo mmosaru nsana, olelo, ni mahiku othene, ni oolaiherya ni Soolempwa iya wira Owo aamwiira?

Eyo yaamwaaminiha muthukumano?

<sup>150</sup> Munihaaxeya ni mukattyamiho wa isyo. Yaari ekeekhai, nvenxe ntata.

<sup>151</sup> Xeeni eyo kweekwe enikimana wiitho? Mutthu oniira, “Owo orimwaanyiherya eyo.” Miyo nkinaanyiherya eyo.

<sup>152</sup> Va, owo muthiyana ooreera murima. Munnikaamini? Vano nyuwo moosuwela wira nkaanyihenrye eyo. Mukihiye kihimye etthu ekina. Aiy’anyu ari ni nyuwo. Ni, awo anoohaaxeya. Kahi siiso? Mulattu wa muthana. Ti yeeyo. Kahi yeeyo? Mookhalana mwammiravo ni nyuwo. Ni, owo onooahaaxeya. Muntthuna wira ovekeleliwe. Ookhalana etthu ehikhanle saana ni maitho

awe. Ti yeeyo. Mookhalana mwanamwane mwamuthiyana ni nyuwo, owo orina mukattamiho wa isyo, ntoko nyuwo. Eyo ekeekhai? Vano nyuwo othene munookhala saana, mwaamini-ru. Munnaamini? Muluku ooreeriheni. Mutthareke ephiro anyu mukhale mukumi.

153 Munnaamini? Owo mmosaru nsana, olelo, ni mahiku othene. Exeeni iyo? Owo omphavelaawe wira? Wa nyuwo, Osuulu w'Abrahamu, Owo onooniherya wira khakhwiye. Miyo nkinwerya wira itthu iyo. Owo khakhwiye. Masi Owo mukumii, owoonihakani wira muhaana ehakhi yo oxintta mikhora sa nwanani anyu. Eyo yaahaana omaliha mwaha.

154 Muhan'ola, murwe va, okathi vakhani paahi. Hiyo nrina ntoko, munnuwelo mmosa, wona waka. Masi hiyo n'a—hiyo n'amalapo mmosa ni mukhw'awe, vansuwelaaka. Miyo nkinoosuwelani, ni n'amalapo. Miyo nkinsuwela etthu ya nyuwo. Yaari ekeekhai, nvenxe ntata, moone. [Munna muthiyana oniira, "Ti yeeyo."—Mol.] Muroovahiwa paahi ettikitti ya mavekelo, nto nyuwo muri va. Vaareera. Vano Apwiya Yesu . . .

155 Vakhala wira miyo, khino, nrowe nihimye wira kaaphavela okuxa nipuro na Munna Oral Roberts, wala amosa-amosa wa alopwana aalupale a waamini, miyo kaamwiira, "Muhano, exeeni evonyeiye ni nyuwo?"

156 Nyuwo mwaamwiira, "Ahe, miyo kirina *lexe ni lexe*." Vano, owo pooti ohikhalana exariya. Munnona? Miyo nkisuwenle. Munnona? Masi, owo, nyuwo pooti omuleela ele evonyeiye.

157 Owo aamuwiixaatheryani matata, aire, "Muluku oookiruma wira—wira kaavekelele aretta. Munnaamini yeeyo?" "Ayo." "Avuwihwe Muluku! Muroweke, mwaamini."

158 Vaareera. Vaareera. Muluku oolaiherya yeeyo. Masi, moone, ninkhala ohoolo vakhani ni—nihiku noovikana eyo. Yesu oohimya, "Ntoko saaryaaya mahiku a oSotoma. Miteko Miyo sinvaraaka nave-tho nyuwo munoovara."

159 Vano, vakhala wira Muluku onoowerya okileela ele mukhanly'anyu, munoosuwela yaaryeene ekeekhai wala nnari, Owo onniwerya wooleelani etthu enrowaanyu okhala, ni yakhala ekeekhai, ni ela enookhala, ekeekhai.

160 Owo ooleelani-ru, etthu p'itthu, miyo nkisuwenle, masi Owo akileela-ru ole okhanle mukattyamiho anyu, onimwaamini, nave, muthukumano?

161 Vekeekhai kaahaana weemela. Okathi yoole, mutthu ule aari va okathi vakhani ovinre, eyo yaahaana olipiherya. Yesu aahiira yeeyo em meta emosa. Owo khaairale-tho hata em meta ekina. Atthu othene oSikari yaahaamini, yaahaamini onamoona wa muthiyana, okathi owo orwiiyaawe, khwaahimeerya, ni owo aari muthiyana mmosa oohifayi. muKristu mmosa onoomaluru okhuma vaplataforma, ohoolo wanyu nyuwo othene! Amen.

Masi okhalaka wira vahooxa ovikana sinuupuwelaahu, Apwiya etthikele wiisooniherya, Muxintta muulupale oowerya, wira Osuulu w'Abrahamu... Masi ntoko Abrahamu, Awo yaahimwiirela eyo Abrahamu, emaara emosa; nto khuhonona, ni khupaka-tho. Abrahamu voohihyererya aahimwaamini Muluku.

<sup>162</sup> Nyuwo khamukhanle va mwaha wa yeenyu. Nyuwo muri va mwaha wa mutthu mukina, ni owo muthiyana. Ti munn'inyu. Vano muhano owo okhuneeliwe eruku ya mookhwaani. Ni owo onihaaxeya ni ti—tiyapeeti. Ni owo kahiyo a wenco. Owo t'a... Owo t'a oLouisiana, elapo ya mattapo. Eyo... Ni va eri etthu ekina, wira muthukumano osuwele ela. Nyuwo mookhalana mwaana muthiyana ohinreere owereiwa, onthuna okhala muthukumano ola, ni orina ecile. Eyo ekeekhaii. Eyo ekeekhaii. Kehiyo? Munnaamini vano? [Munna muthiyana oniira, "Ayo. Amen."—Mol.] Nyuwo mwakhala Osuulu w'Abrahamu, mwaakhele ni mukhume, ni nvonihwe mwa Nsina na Yesu Kristu.

<sup>163</sup> Munnaamini? Vekeekhai. Muupuwele, owo natiri Awe. Owo ohimye wira aamwiira. Owo onnimmaliherya natiri Awe.

<sup>164</sup> Ehaali anyu? Hiyo n'amalapo mmosa ni mukhw'awe. Miyo nkinoosuwelani. Masi Muluku onnoosuwelani. Munnaamini wira Muluku awerya vale okuupululela mukattyamiho anyu, vano nyuwo munoosuwela wira eyo ehaana okhuma mwa owerya wa erooho. Vano, siri itthu piili paahi ekhanlyaaya okhumaka-wo, eyo mwaamuwerya otthokelela. Yaairiwaka, kheniweryaneya oleeliherya, okhala wira etikinihelo. Ni, nave-tho, ti yootikiniha; etthu, ahe, ti yoohitthokeleleya, nnya ekeekhai. Yaamukhala yootikiniha. Nto vano nyuwo munnisuwela, yaari ekeekhai wala nnari, nyuwo munoosuwela sinto Owo ooleenleni ekeekhai.

<sup>165</sup> Vano, muupuwele, miyo nkinoosuwelani. Ohaana okhala Mutthu okihiya miyo. Nyuwo mwaira ntoko aFarisi, ni yiirale, "Oh, eyo erooho yootakhala," vano munookhalana etthuvelo yeele. Mwaamini—ru wira ti Kristu, munimwaakhela etthuvelo Awe. Etthu mukhanlyaanyu waaminelaka, okhala wira Owo oolaiherya eyo mahiku ala, ni khenaireyeke okhuma okathi yoowo mpakha ola. Eyo ennikhaliha ola okathi wookiserya.

<sup>166</sup> Ookhala mutthu onthikela akhumelaka ohoolo wanyu, okathi wothene. Owo mulopwana, a maihi oottweelela. Awo t'aiy'anyu. Akilaanthe vaavale vale. Awo amphavela okupali ovonihwa waya, ookhuneeliwa ni eruku ya kankuru, muuwe, kankuru. Nyuwo murina mukattyamiho wa isyo, mukattyamiho wa eyoso. Nyuwo mwa Mwenye ni Muhano Little. Eyo ekeekhai? [Munna muthiyana oniira, "Ayo."—Mol.] Mwaamini ni murima wothene, nvonihwe.



167 “Nyuwo muniira nawawe, nsina naya?” Vano, vekeekhai. Yesu khaamuhimenrye Petru, “Nsina nanyu ti Simoni, mwaana a Yona?”

168 Va ori mulopwana mmosa. Hiyo n’amalapo mmosa ni mukhw’awe, mulopwana. Miyo nkinoosuwelani. Masi nyuwo mwa mulopwana, ntoko—ntoko Petru saaphiyalyawe wa Pwiya Yesu, hiyo nookumana. Munnaamini wira ka murumeyi Awe? Munnaamini wira etthu ehimyaaka ekeekhai? [Munna oniira, “Ayo, mulopwana. Kinnaamini, mulopwana.”—Mol.] Mwaaweryaka waamini! Miyo, yaakhanle etthu kaarowaaka owerya owiirelani, miyo kaamwiira, masi khiivo etthu enweryaaka wira. Owo ohiira; eyo etthu paahi wira yoophiyererihi waamini. Nto, moone, nkaarowa okhala miyo. Kaari miyo, miyo—miyo kaamwiira sothene kaarowaaka owerya owiirelani. Masi Owo ookivaha yoovaha, nto miyo kimmumula ohoolo Wawe paahi, ni Owo t’onlavula. Munnaamini yeeyo? [“Ayo.”]

169 Munnaamini yeeyo, muthukumano?

170 Miyo kaatthuna omphwanya mulopwana mmosa. Nyuwo mookhalana itthu sinci-ene soohiloka ni nyuwo. Masi emosa wa itthu iyo t’ila, nyuwo murina nipotthe muniithoni noolopwana. Owo mukattiyamiho anyu muulupalexa. Va yookhala etthu ekina, muthiyana mmosa onkhala okhumelelaka va. Awo t’amwaar’inyu. Munnaamini wira Muluku onniwerya okileela etthu evonyeie n’amwaar’inyu va? Mukattiyamiho aya ori mwaano. Maino aya. Ti yeeyo. Munnaamini wira Yesu mmosaru, Yoowo aasuwela taani aari Simoni Petru, aamuwerya okileela nyuwo mw’ani? [Munna oniira, “Ayo.”—Mol.] Eyo yaamurowa owaaminihani vanci-ene? [“Ayo, mulopwana.”] Yaamurowa? [“Ayo.”] Oscar Barnes. [“Ti yeeyo.”] Eyo ekeekhai? Rowakani owaani, nvonihawe.

171 [Nipuro vahiitthu mufiitani—Mol.]...mmalapo wa nyuwo. Miyo nkinoosuwelani, masi Muluku onnoosuwelani. Munnaamini wira Owo onniwerya okileela mukattiyamiho anyu? Mwaamwaamini ni murima anyu wothene? Mukattiyamiho anyu ori vammilo, ni vatthirima vanyu va. O—ohononeya wa makhuva. Nyuwo munikhalana itthu, ntoko, itthokolo ni maphitto muhina mwa makhuva. Ti yeeyo. Nyuwo khamuhiyo a wenno. Nyuwo muri e—epooma emosa erina imatta sa mirarance mapuro othene. Emphwanyaneya mukhatoni, ni mooneyelo wa miyaako ottuli waya. Wookhala oteeli oniitthaniwa Antlers. Ti oSan Bernardino. Nyuwo mwa a weiwo. Mutthike, Yesu Kristu onnoovonihani, mwaamini-ru.

172 Eri etthu emosa paahi enwerya onvonihana kankuru, okhanle Muluku. Munnaamini wira Owo onimoovonihani? [Munna oniira, “Vekeekhai kinnaamini.”—Mol.] Mwaamini! Rowakani, Apwiya Muluku yookhaliheni oopenuwa voomalela.

173 Naanaano munoomalaru ohikha-...wuukhuleya vootepa, ookutakutheya saana. Mwaha wo wuukhuleya nno, nipwiipwi nanyu nrina mukattyamiho. Khimunwerya othotiha yolya anyu; enoowela mpakha mwaano. Owo aasitu mwaano mwanu mothene. Oxekuwa ene, munkhala oowoceya saana ni sothene. Murina makhwatta munipwiipwini. Munnaamini wira ti Yesu Kristu onwerya wooleelani yeeyo? [Munna muthiyana oniira, “Ayo.”—Mol.] Rowakani mwalye yolya anyu y’ohiyu, nto. Mwaamini ni murima anyu wothene, Yesu Kristu onnoovonihani.

174 Ehaali anyu? Sookhala itthu sinci-ene sivonyeiye. Masi emosa wa itthu munoovaanyu, munoorowa orakala ni wiipiwa makhonyokhonyo. Masi munnaamini wira Muluku onimoovonihani, ni onimookhalihani mukumi wa yeeyo? [Munna muthiyana oniira, “Ayo.”—Mol.]

175 Pwiya Yesu, kinvekela wira Nyuwo munvahe munn’aka. Munvahe woona wawe. Mukumihe muxankiho wa muthiyana mwa yoowo, ni munvonihe wiipiwa makhonyokhonyo, mwa Nsina na Yesu. Amen.

176 Rowakani vano, mwaaminiki. Owo onimwiira, ni sothene sinookhala saana. Muhihoverye, mutthikele mweettaka paahi, ni mwaamini ni murima anyu wothene.

177 Eretta ya murima etthu yoowoopiha, masi Kristu onnivoniha murima. Munnaamini yeeyo? [Munna muthiyana oniira, “Ayo.”—Mol.] Rowakani, mwaamini, nto sothene sinimwiiriwa. Yoomala.

178 Munnaamini wira munoorowa okhala oorakala? Nnari, nkinuupuwela siiso, nnakhala. Muupuwelo aka, wiipiwa makhonyokhonyo; eruku ile vale, oh, owo kankuru. Munnaamini wira Owo onoonvoniha? [Munna muthiyana oniira, “Ayo, kinnaamini.”—Mol.] Rowakani, mwaamini. Owo onimookhalihani mukumi.

179 Eyo enoohaaxani vanci-ene mwa okathi, ettiyelelo mmurimani. Masi munnaamini wira enoorowa omala, ohiy’ula? Murowe, mwaamini, Yesu Kristu onnoovonihani.

180 Munnikhalanaka mukattyamiho mukhaani, mukattyamiho wa athiyana, mwa okathi munci-ene. Vano nto, muri, munnikattyamiheya mwaavenyaka voosiisu. Munnooceela wiittikinya, mmettoni mwanu. Onnoorikelani weetta, mpakha ohoolo waya mwa nihiku, wa okathi. Wiipa makhonyokhonyo. Rowakani, muhihoverye, khamunrowa-tho okhalana. Mwaamini paahi, ni murima anyu wothene.

181 Nyuwo mookhalana itthu sinci-ene, ivelavelelo. Masi etthu emosa enoohaaxani vanci-ene, ni nyuwo munuupuwela wiipiwa makhonyokhonyo, yeeyo, enoorakalihani. Munnaamini wira Owo onoweettihani ni wookhalihani mukumi? [Munna muthiyana oniira, “Ayo, mulopwana.”—Mol.]

Rowakani, mwaamini ni murima anyu wothene, Yesu Kristu onimoovonihani.

182 Mukattyamiho wa murima mwaha wo wuukhuwa, ni wiipa makhonyokhonyo, masi munnaamini wira Muluku onimookhalihani mukumi? Munnaamini? Rowakani, Pwiya Yesu onnoovonihani.

183 Napwiiipwi uwo vekeekhai onooruuhelani mukattyamiho munci-ene mwa miyaakha vakhani sookiserya, kahi siiso? Khonrowa-tho. Rowakani, mwaamini. Muluku ooreeriheni. Nvonihawe.

184 Ni nyuwo, pooti, napwiiipwi anyu oovonihawa. Rowakani, mwaamini ni murima wothene. Muhihoverye.

185 Munnikattyamiheya mwaamumulaka, mafuwa awo a khalayi tthiri anookhalihani oolosowa, khaniira? Munnaamini wira anoorowa omala naanaano va? [Munna oniira, "Ayo."—Mol.] Vaareera, murowe mwaamini. Amen.

186 Aleluya! Munnaamini ni murima anyu wothene?

187 Okathi vakhani paahi. Khamunooni Waarya iwe vale? Mwamuthiyana mmosa ooriipa onikiweha miyo, okilaanthi vaava va, owo orina muuwe mpararini mwawe moonoo woolopwana. Owo orina muxankiho wa isyo, mikattyamiho. Nyuwo mwaahikhalana waamini woowaatta. Khamurina owelaka va. Yoomala. Mwaamini paahi. Amen. Mmwaamini Muluku!

Munnaamini yeeyo?

188 Munnaamini, munna, wira munoopenuwa eretta eyo ya muthana, mukilaanthe vo? Munnaamini wira Owo onimookhalihani mukumi? Vaareera. Muhihoverye tu, nto munoowerya waakhela mwaamini-ru paahi.

189 Mulopwan'ola okilaanthi va, akiwehaka, onihaaxeya ni mmavoro, onooventya ohiyu ni itthu siiso. Munnaamini, mulopwana? Enoomalama, nto, mwaamini-ru.

190 Va omphwanyaneya mulopwana mmosa ooriipa okilaanthi va, onikiweha miyo. Owo onihaaxeya ni ecile. Owo nave-tho omphavela opatiiso wa Erooho Yoowaarya. Nvenye mweemele, mulopwana, mukupali ovonihawa wanyu. Muluku oovaheni opatiiso wa Erooho Yoowaarya. Amen.

191 Okilaanthi vakhiviru ni nyuwo, ookhala mwaana mmosa okilaanthe vo, orina ecile nave, ntoko onimphwanyaka ohileya, okilaanthi vo, epantte ekina. Munnaamini wira Muluku onoonvoniha mwaan'owo, vo? Munnaamini ni murima anyu wothene? Vano Muluku onoonvoniha mwaan'owo.

192 Munnaamini, khula mmosa a nyuwo? Owo kahiyo—Owo kahiyo—Owo vekeekhai kahi Osuulu w'Omwene

w'Abrahamu? Owo kahi Muxintta Oowerya? Owo ohimnye wira mwaamuwerya oxintta mikhora sa nwanani?

<sup>193</sup> Akavi a nyuwo atthukiwe, anoona ohaaxa wa nwanani? Nvenxe matata, nyuwo munoona ohaaxa wa nwanani, ni nyuwo mwa Osuulu w'Abrahamu, nvenxe matata anyu *sa*. Muniira, "Munna Branham, wuukhuwa onnikihaaxa." Oh, sookhala ipursento soophiyaka miloko mithanu na miraru sa nyuwo ni yeeyo. Muniira, miyo...Vekeekhai ti yootthipana vano, muttitthi wothene onkhala ntoko neeku nuulupale nootteela, ninihalela okikhaliha oohoona, weiwo muryaanyu.

<sup>194</sup> Nyuwo khamunoona, wira va miloko miili wala miloko miraru, khino, myaha, wala soovikana, vaplataforma vaava ni vamuthukumanoni vale, wira Muluku khonvonya? Ti Yesu Kristu mmosaru nsana, olelo, ni mahiku othene. Munnaamini yeeyo? [Muthukumano oniira, "Amen."—Mol.] Vano mwaha wa xeeni, khula Osuulu w'Abrahamu, muhinkuxeryani ehulelo vano? Muxintta muulupale, ole oxinttale mwaha wa nyuwo, ori vaava. Owo ohooniherya okhala vaava. Munnimwaamini Yoowo?

<sup>195</sup> Vano mukuxe ehulelo anyu ya waamini, mookole ntata, mwiire, "Yesu Kristu, miyo kinnaamini wa ovonihiwa waka, naanaano va." Nvenye mweemele. Nvenxe matata, muhule waamini wanyu naanaano va. "Kinnaamini, Pwiya Yesu. Kinnaamini naanaano va."

<sup>196</sup> Vano mwiixatheryane matata mmosa ni mukhw'awe. Mpweheryane matata mmosa ni mukhw'awe, Osuulu mukina w'Abrahamu. Vano munvekelele mutthu uwo. Nwiixatherye matata anyu yaawo. Yesu ohimnye wira, "Ithoonyeryo iya sinimwaatthara ale anrowa waamini. Awo yawiixaatherya matata aretta, awo anoopenuwa."

<sup>197</sup> Satana, mouxinttiwa ekhotto. Mwa Nsina na Yesu Kristu, mukhume va, mwaahiye atthu ala arowe, wa ovuwa wa Muluku.



64-0207 Tiithi Abrahamu  
Kern County Fairgrounds  
Bakersfield, California wAmerika

EMAKHUWA

©2024 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®. Mwaaphavelaka wiiwa-tho wala ikaruma sikina sikhhanle, xontte mulavule ni:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)